



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka (“Službeni glasnik BiH”, broj: 95/12 i 41/16), člana 25. Pravilnika o godišnjim finansijskim izvještajima političkih stranaka (“Službeni glasnik BiH”, broj: 96/13 i 89/16), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka (“Službeni glasnik BiH”, broj: 103/08), izdajem

### IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2015. GODINU **HRVATSKE SELJAČKE STRANKE**

Broj: 03-07-6-448/16  
Sarajevo, 22.08.2017. godine

## SADRŽAJ

MIŠLJENJE .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS REVIZIJE .....	5
Predmet revizije.....	5
Cilj revizije.....	5
Obim revizije.....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	5
5.1. NALAZI.....	5
5.2. PREPORUKE .....	7

## MIŠLJENJE

Služba za reviziju finansiranja političkih stranaka (u daljem tekstu: Služba za reviziju) izvršila je reviziju godišnjeg finansijskog izvještaja Hrvatske seljačke stranke za 2015. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

**Revizijom godišnjeg finansijskog izvještaja za 2015. godinu, utvrđeno je da je Hrvatska seljačka stranka prekršila odredbe člana 4. stav (1), člana 11. i člana 12. Zakona o finansiranju političkih stranaka.**

**Prema našem mišljenju, osim navedenog, revidirani finansijski izvještaj ukazuje da je Hrvatska seljačka stranka u 2015. godini postupala u skladu sa odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila reviziju godišnjeg finansijskog izvještaja Hrvatske seljačke stranke za 2015. godinu.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2015. godinu, Hrvatska seljačka stranka se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica ( 3-a )	0,00	0,00
3.	Prilozi pravnih lica ( 3-b )	0,00	0,00
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	15.558,29	100,00
8.	Prihodi od propagande ( 3-g )	0,00	0,00
9.	Ostali prihodi	0,00	0,00
<b>I</b>	<b>Ukupni prihodi (1-9)</b>	<b>15.558,29</b>	<b>100,00</b>
<b>II</b>	<b>Kreditno zaduženje kod banaka</b>	<b>0,00</b>	<b>0,00</b>
	<b>Izvori finansiranja (I+II)</b>	<b>15.558,29</b>	<b>100,00</b>

Prema podacima iz godišnjeg finansijskog izvještaja, stranka je ostvarila rashode u ukupnom iznosu od 17.553,88 KM.

## 2. PREDSTAVLJANJE POLITIČKE STRANKE

Naziv političke stranke je Hrvatska seljačka stranka. Skraćeni naziv je HSS.

Stranka je registrovana kod Općinskog suda u Mostaru dana 13.09.2010. godine, Rješenjem broj: R/5-10.

Sjedište političke stranke je u Mostaru, ulica Kralja Petra Krešimira IV L-5<sup>1</sup>.

Lice ovlašteno za zastupanje stranke je Mario Karamatić, predsjednik stranke.

Lice ovlašteno za podnošenje finansijskih izvještaja za 2015. godinu je Mario Karamatić.

Prema podacima iz godišnjeg finansijskog izvještaja za 2015. godinu, organizacionu strukturu Hrvatske seljačke stranke čine:

- Središnjica stranke i
- Organizacioni dio stranke u Brčko Distriktu BiH.

<sup>1</sup> Hrvatska seljačka stranka je, putem akta broj: Ur.br.1/10/15 od 15.11.2015. godine, obavijestila Centralnu izbornu komisiju BiH da će se komunikacija sa strankom obavljati na novoj adresi u Posušju, Ulica Fra Grge Martića 31.

### 3. OPIS REVIZIJE

**Predmet revizije** je godišnji finansijski izvještaj Hrvatske seljačke stranke za 2015. godinu i to sljedećih organizacionih dijelova političke stranke:

- Središnjice HSS Mostar i
- Organizacionog dijela HSS u Brčko distriktu BiH.

**Cilj revizije** je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Hrvatska seljačka stranka u izvještajnom periodu postupala u skladu sa odredbama Zakona o finansiranju političkih stranaka.

**Obim revizije** finansijskog izvještaja Hrvatske seljačke stranke obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta.

### 4. PRETHODNE KONTROLE I REVIZIJE

U periodu od 2010. do 2014. godine, obavljani su pregledi godišnjih finansijskih izvještaja Hrvatske seljačke stranke, nakon čega su izdati izvještaji o pregledu sa mišljenjem revizora, nalazima i preporukama revizije, osim 2013. godine za koju stranka Centralnoj izbornoj komisiji BiH nije podnijela godišnji finansijski izvještaj, niti je omogućila pristup svojim prostorijama kako bi se izvršila revizija. Centralna izborna komisija BiH je, u okviru svojih nadležnosti utvrđenih u članu 14. stav (2) Zakona o finansiranju političkih stranaka, Odlukom broj: 03-07-6-1104/15 od 09.12.2015. godine Hrvatskoj seljačkoj stranci izrekla administrativnu mjeru, u skladu sa članom 10. stav (8) istog Zakona, kojom se stranci uskraćuje pravo da se kandiduje na narednim izborima (Lokalnim izborima 2016. godine).

Nakon obavljenog pregleda finansijskog izvještaja za 2014. godinu, Hrvatskoj seljačkoj stranci su date preporuke: da finansijske izvještaje podnosi u formi koju je odobrila Centralna izborna komisija BiH, da finansijske izvještaje podnosi u zakonom propisanom roku i da dostavlja dodatnu dokumentaciju koju od nje zatraži Centralna izborna komisija BiH.

#### **Nerealizovane preporuke:**

Hrvatska seljačka stranka nije ispoštovala preporuke revizije.

### 5. NALAZI I PREPORUKE

#### 5.1. NALAZI

##### **a) Hrvatska seljačka stranka je prekršila odredbe člana 4. stav (1) Zakona o finansiranju političkih stranaka.**

Revizijom finansijskog izvještaja i finansijske dokumentacije koju je predočila politička stranka, utvrđeno je da Hrvatska seljačka stranka nije donijela program utroška sredstava za 2015. godinu i da za izvršene gotovinske isplate sredstava u iznosu od 14.030,00 KM, koja je obezbijedila iz budžeta Brčko distrikta BiH i budžeta Općine Posušje, nema finansijsku dokumentaciju, niti je u finansijskom izvještaju i poslovnim knjigama prijavila blagajničko poslovanje.

Obzirom da je sredstva, koja je obezbijedila iz budžeta, politička stranka koristila bez programa utroška sredstava i da u toku revizije nije predočila dokaze u koju svrhu su ista isplaćena, odnosno račune ili druge dokumente na osnovu kojih su vršene isplate, Hrvatska seljačka stranka je prekršila odredbe člana 4. stav (1) Zakona o finansiranju političkih stranaka, koji propisuje da stranka finansijska sredstva iz člana 3. stav (1) ovog Zakona može koristiti isključivo za ostvarivanje ciljeva utvrđenih svojim programom i statutom.

**b) Hrvatska seljačka stranka je prekršila odredbe člana 11. i člana 12. Zakona o finansiranju političkih stranaka.**

Revizijom je utvrđeno da Hrvatska seljačka stranka nije vodila poslovne knjige u skladu sa računovodstvenim propisima, nije prijavila jedan transakcijski račun, nije vodila blagajničko poslovanje i nije pravilno evidentirala rashode, čime je prekršila odredbe člana 11. i člana 12. stav (1) Zakona o finansiranju političkih stranaka.

Godišnji finansijski izvještaj za 2015. godinu stranka nije popunila u skladu sa Pravilnikom o godišnjim finansijskim izvještajima političkih stranaka, na zahtjev Centralne izborne komisije BiH nije dostavila traženu finansijsku dokumentaciju, niti je istu predočila revizorima tokom obavljanja revizije, čime je prekršila odredbe člana 12. stav (3) i (4) Zakona o finansiranju političkih stranaka<sup>2</sup> i ograničila djelokrug revizije.

- (1) Politička stranka u poslovnim knjigama i finansijskom izvještaju nije prijavila transakcijski račun broj: 3382402212127729, koji je prema podacima Centralne banke BiH aktivan od 13.02.2012. godine. Tokom obavljanja revizije finansijskog izvještaja za 2015. godinu, Hrvatska seljačka stranka nije dala na uvid izvode sa navedenog transakcijskog računa, niti bilo kakve podatke o njegovom prometu.

Stranka nije iskazala promet transakcijskog računa organizacionog dijela stranke u Brčko distriktu BiH, koji je prijavila u finansijskom izvještaju. Uvidom u izvode banke utvrđena je uplata sredstva u iznosu od 14.486,80 KM i isplate sredstva u iznosu od 13.968,78 KM.

U skladu sa odredbama člana 11. Pravilnika o godišnjim finansijskim izvještajima političkih stranaka, Hrvatska seljačka stranka je bila obavezna prijaviti sve transakcijske račune, iskazati njihov promet u izvještajnom periodu i stanje računa na dan 31.12.2015. godine.

- (2) Hrvatska seljačka stranka u poslovnim knjigama nije evidentirala blagajničko poslovanje, niti je u finansijskom izvještaju iskazala promet gotovine putem blagajne i stanje na dana izvještajnog perioda. Tokom obavljanja revizije predsjednik političke stranke, te istovremeno i osoba ovlaštena za finansijske izvještaje, dao je pisanu izjavu da Hrvatska seljačka stranka u 2015. godini nije poslovala gotovim novcem.

Uvidom u izvode sa dva transakcijska računa utvrđen je gotovinski promet u iznosu od 14.030,00 KM. Sa transakcijskog računa Središnjice HSS u Mostaru podignuta je gotovina u iznosu od 5.000,00 KM i transakcijskog računa organizacionog dijela HSS u Brčko distriktu BiH u iznosu od 9.030,00 KM.

Neprijavlivanjem prometa blagajne u finansijskom izvještaju politička stranka je prekršila odredbe člana 12. Pravilnika o godišnjim finansijskim izvještajima političkih stranaka.

- (3) Stranka nije iskazala troškove na propisani način, čime je prekršila odredbe člana 22. Pravilnika o godišnjim finansijskim izvještajima političkih stranaka.

Troškove, koje je u finansijskom izvještaju prijavila u iznosu od 17.553,88 KM, iskazala je sintetički i to: troškove usluga u iznosu od 5.463,00 KM, od kojih proizvodne usluge 3.363,00 KM, što nije svojstveno djelatnosti političke stranke, troškove materijala u iznosu od 2.104,00 KM, nematerijalne troškove 2.354,00 KM, ostale troškove u iznosu od 1.000,00 KM, režijske troškove Središnjice stranke u Mostaru u iznosu od 1.200,00 KM, iako prema izjavi predsjednika nije korišten poslovni prostor.

Politička stranka u toku revizije nije predočila račune, niti bilo koje druge dokaze o prijavljenim troškovima u finansijskom izvještaju.

- (4) Hrvatska seljačka stranka u finansijskom izvještaju nije prijavila obaveze na dan 31.12.2015. godine, te je prekršila odredbe člana 24. Pravilnika o godišnjim finansijskim izvještajima.

---

<sup>2</sup> „Službeni glasnik BiH“ broj: 95/12.

Uvidom u finansijske izvještaje stranke iz prethodne godine, u kome su obaveze po osnovu zajmova na dan 31.12.2014. godine iskazane u iznosu od 17.000,00 KM, izvode sa transakcijskih računa u 2015. godini, na kojima je evidentiran povrat zajma u iznosu od 4.000,00 KM, a obzirom da stranka nije predočila dokaze da su joj obaveze otpisane, nedvosmisleno je utvrđeno da Hrvatska seljačka stranka u izveštaju za 2015. godinu nije prijavila obaveze u iznosu od 13.000,00 KM. Obaveza nije prijavljena prema Brčko gas osiguranju u iznosu od 10.000,00 KM i Farmi Tomislavgrad u iznosu od 3.000,00 KM.

- (5) Godišnji finansijski izvještaj za 2015. godinu koji je, u skladu sa odredbom člana 12. stav (3) Zakona o finansiranju političkih stranaka, bila obavezna podnijeti Centralnoj izbornoj komisiji BiH do 31.03.2016. godine, Hrvatska seljačka stranka je podnijela 27.06.2016. godine.
- (6) Politička stranka nije postupila po zahtjevu Centralne izborne komisije BiH, broj: 03-07-6-448-3/16 od 04.10.2016. godine, da dostavi dodatnu finansijsku dokumentaciju, kopije ugovora o zakupu, kopije poslovnih knjiga, kopije izvoda sa transakcijskih računa, kopije blagajničke dokumentacije i dokaze o obavezama stranke, čime je prekršila odredbe člana 12. stav (4) Zakona o finansiranju političkih stranaka.
- Ni u procesu revizije Hrvatska seljačka stranka, osim izvoda sa dva transakcijska računa, bruto bilansa Centrale HSS Mostar, Završnog računa organizacionog dijela HSS u Brčko distriktu BiH i ugovora o zakupu poslovnog prostora u Brčkom, nije omogućila uvid u finansijsku dokumentaciju, čime je ograničila djelokrug revizije.

## 5.2. PREPORUKE

*Preporučuje se Hrvatskoj seljačkoj stranci da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da u svrhu ostvarivanja svojih programskih ciljeva svake godine donosi program utroška sredstava,*
- *da vodi poslovne knjige u skladu sa računovodstvenim propisima i da uspostavi potpune i tačne evidencije o svojim rashodima,*
- *da finansijske izvještaje Centralnoj izbornoj komisiji BiH podnosi u skladu sa Zakonima iz njene nadležnosti,*
- *da uspostavi blagajničko poslovanje u skladu sa važećim propisima.*

### KOMENTAR:

U ostavljenom roku, Hrvatska seljačka stranka nije se očitovala na Preliminarni izvještaj o reviziji godišnjeg finansijskog izvještaja za 2015. godinu.

Pomoćnik revizora

Mr.sc. Goran Cicović

Šef Službe za reviziju, revizor

Mr.sc. Hasida Gušić